

Iran demantira prekid izvoza nafte

15 februar 2012 Izmijenjeno 20:40 CET

Službeni Teheran uputio pismo Catherine Ashton u kojem iskazuje spremnost za obnovu pregovora o nuklearnom programu



Glavni pregovarač za nuklearni program Saeed Jalili izvijestio je Brisel da je spreman nastaviti pregovore o nuklearnom programu [AFP/Getty]

Iransko ministarstvo za naftu opovrgnulo je u srijedu vijest da je Islamska Republika prestala izvoziti sirovu naftu u šest evropskih zemalja, a glavni pregovarač za nuklearni program Saeed Jalili izvijestio je Brisel da je spreman nastaviti pregovore o nuklearnom programu, javile su agencije. "Opovrgavamo tu vijest... Bude li takva odluka donesena (o prekidu izvoza nafte), objavit će je Iransko vrhovno vijeće za nacionalnu sigurnost", rekao je glasnogovornik ministarstva agenciji Reuters.

Teheran redovno odbacuje optužbe međunarodne zajednice da pod krinkom civilnog nuklearnog programa nastoji razviti atomsko oružje.

Iranska televizija Press TV, koja emitira na engleskom jeziku, objavila je da je Iran prestao izvoziti naftu u Francusku, Portugal, Italiju, Grčku, Holandiju i Španiju.

ZA SAD 'NIŠTA NOVO'

SAD su u srijedu umanjile značaj posljednjih objava o napretku iranskog nuklearnog programa, saopćivši da postignuća o kojima izvještava Teheran "nisu strašno nova, a ni strašno dojmlija". "Mi iskreno u tome ne vidimo mnogo novog. To nisu velike vijesti. Zapravo se čini da je to preuveličavanje", rekla je glasnogovornica State Departmenta Victoria Nuland novinarima u Washingtonu.

Službeni Teheran redovno odbacuje optužbe međunarodne zajednice da pod krinkom civilnog nuklearnog programa nastoji razviti atomsko oružje i zbog tog nuklearnog programa Vijeće sigurnosti Ujedinjenih naroda (UN) donijelo je šest rezolucija o Iranu, od kojih su četiri popraćene sankcijama.

Ulaganje nuklearnih šipki

Glavni iranski pregovarač za nuklearna pitanja u srijedu je poslao pismo šefici evropske diplomatije Catherine Ashton, u kojem izražava spremnost nastaviti pregovore sa skupinom 5+1, prenosi iranska televizija Al-Alam, koja emitira na arapskom jeziku, prenosi AFP.

Države članice EU odlučile su prestati uvoziti sirovu naftu iz Irana od 1. jula zbog njegova nuklearnog programa.

"Pismo Saeeda Jalilija predano je uredu Catherine Ashton i njime se iskazuje spremnost za obnovu pregovora ... kako bi se ostvarili temeljni pomaci prema saradnji", prenio je Al-Alam. Vijest o spremnosti Irana za nastavak pregovora objavljena je istodobno s viješću da je iranski predsjednik Mahmoud Ahmadinejad prisustvovao ulaganju u reaktor prvih nuklearnih gorivnih šipki iranske proizvodnje, što je predstavljeno kao dostignuće iranskih naučnika, prenosi Hina.

Države članice Evropske unije (EU) odlučile su prestati uvoziti sirovu naftu iz Irana od 1. jula zbog njegova nuklearnog programa, a iranski ministar za naftu izjavio je 4. februara da će Iran sigurno prestati izvoziti naftu u "neke" evropske zemlje.

Izvor: Al Jazeera